

春秋取義測

第一冊

PL  
2470


Z6 F32

1794a

V. 1







Digitized by the Internet Archive  
in 2021 with funding from  
University of Toronto



乾 隆 甲 寅 年 鑄

膠州法坤宏著

粵省西湖街  
六書齋刻

春  
秋  
取  
義  
須

受業門人胡纓蘭手書



金 丰 寅 甲 劉 璋

業門人謁集蘭毛書

春禾夏麥秋興

題此軒式養

六書圖說



取義測題詞

取義測測春秋之義也春秋取義微旨寓於筆削  
周轍東王道廢孔子有聖德無其位欲行其義而  
無從乃假魯史以達之義非魯史之義非孔氏之  
義而筆削所取之義故曰其義春秋述也其義則  
作也文事因魯史之舊筆削寓行義之權一變至  
道所謂見諸行事以此







春秋取義測卷之一



膠州法坤宏

隱公

元年春王正月

春王正月王者建正之始月故謂之王正春秋  
開始大書之義繫於王正月也春王正月之文  
立而紀事有統矣取義有歸矣國君繼世改元  
必於歲之正月行即位禮正始也而隱公闕焉  
無其事闕其文此魯春秋之法因史文之本闕  
而闕之書正月不書即位以正諸侯之始無正



者此孔子修春秋之法春秋之修撥亂世返之  
正立元年春王正月之文以正二百四十二年  
諸侯大夫之行事此則所謂取義也

二月公及邾儀父盟于蔑

春秋之法事在二月書王二月事在三月書王  
三月今三月不書王者舉王正為重公隱公也  
不書即位疑於無公矣於始事書公特筆也正  
其名以責實名實定然後禮義有所錯及內詞  
也雖伯國會盟我往與之亦書公及僖五年公及齊侯會  
盟首止六年公及齊侯伐鄭圍新城內王國而外侯封內本國而



外諸夏此乃史例邾者魯之附庸儀父稱名微國之君之未爵命者盟好也初即位而修鄰好禮也故於始事舉之會盟征伐王事也諸侯大夫行之可乎諸侯大夫奉行王事者也行之而義則為有道行之而不義則為無道屬其文比其事是非功罪昭然具見孔子取義即於是乎在茂盟地也地不繫國義繫於盟不繫於所盟之地特書盟志諸侯之自相為盟也此內盟之始

夏五月鄭伯克段于鄆



卷一  
譏鄭伯之殺其弟也春秋之法敘世子母弟目君段鄭伯弟不言弟者正名討賊屬籍已絕也此鄭志何以書春秋為王者而作莊不友段不弟至於國內稱兵人倫之大變王事之所禁也故孟子曰春秋天子之事

秋七月天王使宰咺來歸惠公仲子之賵

或稱天王或稱王皆仍史文宰官名咺宰名宰有大小宰周公大宰也宰咺宰渠伯糾小宰也仲子惠公母稱惠公仲子母以子氏同僖公成風別嫡庶也歸賵歸含王朝卹侯國常禮春秋



獨于仲子成風兩見者以天王而賵含諸侯之  
妾母特筆之志禮之變

九月及宋人盟于宿

譏私盟也宋人宋之大夫孰及之公也不書公  
者不以外大夫與公敵尊內也盟以結信義而  
行之隱元年及邾儀父盟矣秋又及宋人盟矣  
乃七年秋伐邾十年夏伐宋信義安在取義以  
比屬而見故曰屬詞比事春秋教也

冬十有二月祭伯來

祭伯王官王官與外臣出入分勞其得交政非



私也周德雖衰典禮猶在故祭伯因事來魯而  
史書于冊春秋書來不書事據祭公來事無足  
書也譏王事之寢微也

### 公子益師卒

書卒君卒之也卒者人道之終君舉其禮史立  
其文春秋筆之以明敬大臣之義不書葬葬者  
臣子之事非公家所及

### 二年春

隱在位十一年自元年春月一書王正外餘月  
皆不書有特書以明義有不書以示例春秋義



例法也

公會戎于潛○夏五月莒人入向

此入國之始特筆之禮樂征伐自天子出諸侯  
擅之罪也○時王室東遷諸侯小大相屬強弱  
相役向杞近魯我所属役者也故其見入見伐  
志于魯史據桓十六年城向  
向當是我属邑

無駭帥師入極

無駭不氏未命氏也不氏而書名人以事錄也  
書帥師重帥師也此内臣帥師之始

秋八月庚辰公及戎盟于唐



庚辰月之日也史家記事年必書月月必書日春秋筆削史文則有日有不日義繫書其事不繫書日與不書日也戎以弭舉外之也聲教之外王者所弗治會戎盟戎皆譏辭

九月紀履緌來逆女冬十月伯姬歸于紀

錄姻好也外大夫以事接我通名履緌紀大夫也婚姻人道之始史得備書之春秋於伯姬之逆歸卒葬詳錄始事以見義而餘女則因變而書雖詳略不同要皆所以明重

紀子伯莒子盟于密



非國事何以書莒與我不睦紀我之婚姻以我故與莒盟特筆之為下盟浮來起本子伯二字疑有脫誤家鉉翁曰于蔑內盟之始也于密外盟之始也內外盟必書志東遷諸侯無所統一自相為盟也

冬十有二月乙卯夫人子氏薨

隱母也薨而不葬故也春秋于君夫人薨卒無不書葬者哀姜薨于夷猶書葬如氏卒不稱薨不稱夫人亦書葬書薨書卒而不書葬惟隱母子氏昭夫人孟子隱終于攝子氏之薨不書葬



攝故也昭終于孫孟子之卒不書葬孫故也○  
一子氏耳左以為仲子公羊以為隱母穀梁以  
為隱妻宜何從羣言淆亂折諸聖三傳錯疑斷  
諸經按禮經無葬妻之明文凡春秋所薨葬皆  
君母仲子之薨不見經孟子卒于哀公之世自  
嗣君視之亦母也今從公羊

鄭人伐衛

譏始伐也征伐王事諸侯出之無道之效也○  
前用兵私邑故曰克此用兵鄰封故曰伐

三年春王二月



魯史之法月必書王春秋特書春王正月周正月也尊正朔也大書王三月王二月夏商正月也存三統也自四月以下不書王義無所取也已巳日有食之

敬天變也日官舉其禮史氏書其事孔子備錄之以示義

三月庚戌天王崩

天王志崩不志葬崩大變也故書七月而葬有常時同軌畢至有常禮故不書於莊僖頃之不書崩王室不赴也於桓襄匡簡景之并書葬則



或以非時或以失禮猶之以變書也

夏四月辛卯尹氏卒

尹氏王臣也

據昭二十五年尹氏立王子朝

卒書氏赴以氏也

不書名

據王子虎劉卷書名

未同盟也義詳八年宿男卒

王臣之卒葬不志于始事特卒之有書以見其有不書也

秋武氏子來求賻

武氏王臣武氏子子代父使也不書王使王方在喪也求之為言徵也賻以供葬侯國之常書來求以志變禮



八月庚辰宋公和卒

內君曰薨內大夫曰卒宋公君也而曰卒內外異稱從史文也名死者以別乎生者○凡外諸侯書卒告赴所及也書葬本國往會也春秋備錄之示交邦之義

冬十有二月齊侯鄭伯盟于石門

譏外諸侯自為盟也有道之世天子巡方諸侯述職盟會征伐固方伯所有事矣時至春秋威權下移隱桓之際政散於羣侯莊閔以還政僭於五伯文宣而後政亂於大夫春秋取二百四



十二年諸侯大夫之行事裁以大義治其散者  
僭者亂者而一歸於王事所謂撥亂世反之正  
也

癸未葬宋穆公

稱國據我葬彼之辭也舉謚稱公據彼國自稱  
之辭也從史文例

四年春王二月莒人伐杞取牟婁

諸侯伐國取邑於是始特筆之

據下杞侯來朝杞亦當是我屬

國書法與莒人入向同

戊申衛州吁弑其君完



臣弑君大變也目其人使惡有所歸

夏公及宋公遇于清

諸侯非王事民事而假遇相見以行其私皆義之所不得魯宋遇清而翬有伐鄭之會宋衛遇垂而三國有瓦屋之盟比觀而遇之罪無所逃矣

宋公陳侯蔡人衛人伐鄭

此外諸侯連兵伐國之始特筆之宋陳稱爵君親往也衛蔡稱人大夫行也衛賊未討宋以大國上公黨惡殃民伐而又伐直書其事而義自



見

秋翬帥師會宋公陳侯蔡人衛人伐鄭

翬書名帥師也舉帥師為重此會伐之始

九月衛人殺州吁于濮

稱人討賊之辭也亂臣賊子人得殺之

冬十有二月衛人立晉

立君有國常討賊有大法書曰衛人殺州吁而  
殺賊之義著矣書曰衛人立晉而立君之義著  
矣○嗣君不言立言立皆譏詞公羊子云立者  
不宜立也譏自立之詞也左氏云書曰衛人衆



也譏衆立之詞也春秋之世嗣弑君而立者多矣譏不勝譏舉首事以明義

五年春公觀魚于棠

傳曰譏非事也事謂王事民事

夏四月葬衛桓公

書葬魯往會也傳例云凡君弑賊不討不書葬然蔡般弑其君書葬矣春秋無通詞惟所取義有其事之義二百四十二年諸侯大夫之行事是也有其文之義冊府所藏舊典禮經是也有孔子之取義則筆削春秋以俟知我罪我所謂



其義是也

秋衛師入郕

公羊將尊師衆稱某帥師將尊師少稱將將卑師衆稱師將卑師少稱人君將不言帥師書其重者

九月考仲子之宮初獻六羽

譏考宮也禮庶子為君為其母築宮使公子主其祭于子祭于孫止仲子惠公之母隱為考宮焉非禮矣初獻六羽僭樂也

邾人鄭人伐宋



螟

邾先鄭從告也國無大小皆連兵相伐備錄之  
見王事之失○會盟則先主會征伐則先主兵  
志災也王事莫亟於勤民有害於民故書○齊  
履謙曰春秋所書有災有異害及於民之謂災  
物反其常之謂異二者魯皆備書諸國惟異則  
書之蓋災則事止一國異則理關天下故於內  
外所書如此

冬十有二月辛巳公子彊卒

公子之卒不備錄錄其卒者公子而為大夫者



也

宋人伐鄭圍長葛

書伐書圍書取春秋詳錄之譏諸侯之無王

六年春鄭人來輸平

釋憾而平本是善事輸平者以利相結則私也  
春秋嚴義利之辨書鄭人來輸平鄭人來歸祊  
我入祊鄭伯以璧假許田皆以志諸侯之行私  
夏五月辛酉公會齊侯盟于艾

齊主盟而我往會也此伯事之肇端特筆之

秋七月



月以紀事無事書秋七月備時也然隱元年三月有事矣猶復書春王正月知舊史於首月不皆無事事之無關於義者仲尼削之耳蓋他月無事書首月通法也二百四十二年所同也他月有事猶書首月變例也元年正月所獨也通法以統同變例以示異然則四時具而歲功成大書首月春秋所以編年也王正立而人紀修特書春王正月春秋所謂正始也

冬宋人取長葛

七年春王三月叔姬歸于紀



卷一  
姒姬伯姬之娣待年於宗國至是歸春秋因變  
事特書之錄賢也是故書姒姬歸于紀紀姒姬  
歸于鄫紀姒姬卒葬紀姒姬而姒姬之賢見矣  
書伯姬歸于宋四國來媵宋災伯姬卒葬宋共  
姬而伯姬之賢見矣

### 滕侯卒

胡傳滕侯宿男卒不書葬怠於禮弱其君而不  
葬也怠於禮而不往弱其君而不會無其事而  
闕其文此魯史之舊聖人無加損焉存其平闕  
其葬而義自見愚按春秋因闕文以取義於此



可參其凡

夏城中丘

傳曰以重書也蓋莫重於用民力矣雖時且義必書見勞民為重事

齊侯使其弟年來聘

譏私聘也朝聘王事而以私交故於始事譏之  
○春秋於諸侯之朝聘備書之以志典禮其有  
交私結黨修睦善鄰皆可即事而考功罪之在  
於此見聖人之取義

秋公伐邾○冬天王使凡伯來聘戎伐凡伯于楚



丘以歸

此王朝下聘之始亦以變事書也古者天子守在四夷諸侯守在四國天王使凡伯來聘戎伐凡伯于楚丘以歸故以為事之變特書之○伐國曰伐楚丘衛邑而曰伐王臣所在之地視國即君在書伐之義

八年春宋公衛侯遇于垂

為瓦屋之盟起文

三月鄭伯使宛來歸祊庚寅我入祊

祊鄭邑鄭人來輸平故以祊歸我書鄭歸祊書



我入祊明其相結以利

夏六月己亥蔡侯考父卒○辛亥宿男卒

卒而不名未同盟也時羣侯強大相尚以弱小  
為屬役凡不與同盟者不列於諸侯名不通于  
告赴宿後為宋遷滕薛杞降侯稱子伯傳以為  
微國之君未能同盟其說是矣杞伯自蟲牢以  
還三與同盟卒葬乃得書名滕薛亦云滕子原  
卒

昭三

薛伯穀卒

昭三十一年

傳皆曰同盟故也

秋七月庚午宋公齊侯衛侯盟于瓦屋

諸侯之參盟于是始有參盟然後有主盟○盟



非一國之志盟于瓦屋宋列齊上序爵也齊衛  
胥命而後羣侯列序始以強大相先矣

八月葬蔡宣公○九月辛卯公及莒人盟于浮來  
莒稱人君臣同詞微之也特書盟舉王事為重  
螟○冬十有二月無駭卒

無駭卒不氏未賜氏也春秋之法公之子為大  
夫稱公子公子益師公子疆之類是也公子之  
子為大夫稱公孫公孫茲公孫敖之類是也大  
夫賜氏稱氏公子季友臧孫辰之類是也大夫  
未賜氏稱名無駭挾之類是也



九年春天王使南季來聘

同時貳事書春書三月不書正月明隱之無心也隱無心桓無王天誅所當加而聘屢及焉隱桓之世王聘凡五見皆以譏變禮於僖之聘以公子遂如京師書於宣之聘以報孟獻子書春秋以屬比為教文事具而義各自見

三月癸酉大雨震電庚辰大雨雪

程子曰陰陽運動有常而無忒凡失其度皆人為感之故春秋災異必書

挾卒



凡名卒者皆大夫故無駭與挾不氏亦書卒翬  
於桓世稱公子貴視大夫矣而不書其卒與桓  
編之大夫壹貶焉明不以翬府獄也隱之弑桓  
實主之

夏城郎○秋七月○冬公會齊侯于防

十年春王二月公會齊侯鄭伯于中丘

會于防謀伐宋也于中丘為師期也備錄之著  
諸侯連兵之惡

夏翬帥師會齊人鄭人伐宋六月壬戌公敗宋師  
于菅辛未取郕辛巳取防



伐宋稱翬敗宋稱公本兩事春秋兩書之徵信

也郕國名

僖二十年  
郕子來朝

防邑名

莊二十九年  
城諸及防

邑曰

取國曰滅內諱滅國故史于郕防皆書取

秋宋人衛人入鄭

鄭結齊魯以伐宋宋結衛以入鄭連兵報復由  
於王政不綱諸侯放肆

宋人蔡人衛人伐戴鄭伯伐取之

三國稱人皆大夫也國曰伐師曰取大夫與師  
其體敵統稱伐取兼取戴與三國之人

冬十月壬午齊人鄭人入郕



汪克寬曰入春秋之始兵爭倂擾未有若是年之尤者夏三國伐宋秋宋衛入鄭又偕蔡伐戴鄭莊又圍戴取三國之師且偕齊入郕戰國之殺人盈城圯於此矣春秋之所以作乎

十有一年春滕侯薛侯來朝

此書來朝之始滕薛稱侯舉本爵也國後以日

微為人後

宋仲幾曰滕薛鄭吾後也

降稱子伯不列于同盟

來朝不特言者微之也特筆之譏朝禮之變

夏公會鄭伯于時來

月不書正不朝正也出不書至不告至也不朝



正無王不告至無祖亂之階也春秋所由托始于隱

秋七月壬午公及齊侯鄭伯入許

據後文許畛入許則今茲之入君已亡國已滅矣不書滅者入而不有其土傳云齊侯以許讓公公不受乃與鄭人

冬十有一月壬辰公薨

公薨不地故也不書葬不成喪也不書弑為國諱惡







春秋取義測 卷之二

膠州法坤宏

桓公

元年春王正月公即位

繼世即位國君正始大禮於法應書隱桓二公  
一書一不書者各於其遇而行事不同故史氏  
立文亦異孔子因之隱以攝立無正也不書即  
位以見其無正桓以篡立無王也大書即位以  
見其無王書正書王乃春秋取義大法託始二  
公以見之夫是之謂特筆



三月公會鄭伯于垂

定公位也

鄭伯以璧假許田

因會而請田也其曰假史氏書請田之文春秋特筆之綜前歸祊事以見義

夏四月丁未公及鄭伯盟于越

比書會垂假田盟越著諸侯無王之惡

秋大水

不書月概一秋而言傷人害稼故書大

冬十月



二年春王正月

隱無正而元年書春王正月者存王正也桓無  
王而元年二年書春王正月者正王法也春秋  
嚴亂賊之誅一施之於内外元年書王以王法  
正桓主我魯言之二年書王以王法兼正晉概  
天下言之

戊申宋督弑其君與夷及其大夫孔父

孔父不書殺而書及

據成十八年晉殺其大夫胥童

及累及也

傳曰弑君稱君君無道也稱及大夫大夫亦與  
有責焉春秋書死君者三人

孔父仇牧荀息

並以累及



之詞言之蓋三人者賢大夫也賢而當國其權  
宜足以濟變其正宜可以閑君至君弑身殺必  
其於道有不克自盡者春秋之法責賢者備特  
書及備責之之辭也

滕子來朝

譏朝桓也篡弑之賊諸侯不能討相與朝之無  
王甚矣春秋於桓世來朝者九國

滕杞紀穀鄧  
曹邾牟葛

屢書而壹貶○五等之爵有定名有虛號天子  
三公稱公王者之後稱公定名也魯侯爵而稱  
公諸侯之葬稱公虛號也其稱子伯也亦云毛



伯召伯稱伯單子劉子稱子皆王官也宋公衛侯在喪稱子叔武無官以攝位故稱子邾邾附庸與于伯會進稱子四夷雖大皆曰子滕薛杞微國侯伯子不一其稱乃一時強大為之升降此春秋前事魯史舊文孔子仍而弗改者取義有旨所謂貴賤不嫌同號美惡不嫌同辭也

三月公會齊侯陳侯鄭伯于稷以成宋亂

成者平也宋有弑君之亂公為求會諸侯以平之故成宋亂之事詳書於魯史澶淵之會亦然宋災我伯姬卒焉故為求會以邠之此乃魯事



與外諸侯有事而我往會者異矣書成宋亂書  
宋災故皆據魯史文直書之

夏四月取郕大鼎于宋戊申納于大廟

取郕鼎于宋賂也納于太廟非禮也直書之不  
為婉詞焉傳例云內以諱為惡桓之惡德可諱  
乎春秋於桓編壹不書王外餘皆從直筆

秋七月杞侯來朝○蔡侯鄭伯會于鄧

始懼楚也其地以國鄧亦與焉楚後卒敗蔡虜  
其君鄭屢受伐鄧侯吾離亦失其國土聖人以  
此為楚禍中國之肇端特筆之



九月入杞○公及戎盟于唐○冬公至自唐  
按傳告于廟也凡公行告于宗廟及行飲至舍  
爵策勲焉禮也然則常事爾何以書古者役不  
踰時非王事則不出非民事則不出今羣公去  
國久役而非時非事常也幾於變矣聖人因舊  
策存而弗削乃以示譏

三年春正月

三年正月不書王桓無王也桓篡兄盜國薨踰  
年而錫命始至是當桓身固未嘗朝王受命也  
隱以攝立不朝正春秋於隱世不書正桓以弑



立不朝王春秋於桓世不書王故曰隱無正桓  
無王○隱之無正也非隱無正也自盟蔑以還  
大政不出於王國春秋之諸侯皆無正也託始  
於隱焉耳桓之無王也非桓無王也自胥命而  
後王命不行於天下春秋之諸侯皆無王也託  
始於桓焉耳然則隱元年之特書正月以正隱  
也攝不即位不得正其始薨不書地不得正其  
終無正之大者已桓元年二年之大書春王以  
正桓也既弑君而自立又納賂以立人之弑其  
君者無王之甚者已



公會齊侯于嬴

成婚於齊也書會而不繫之事於下公子翬如齊逆女見之譏公不由媒介而自成婚○王克揆曰桓之禍文姜為之始不衷於禮而終罹其變春秋詳錄文姜所以正夫婦之倫而謹人道之始

夏齊侯衛侯晉命于蒲

晉命相命也凡王命稱命

據經文三錫命

諸侯晉命僭

也春秋之初王靈猶在會盟征伐皆假王命行事假之不已遂至晉命晉命而伯則伯矣春秋之五



伯胥命而王則王矣

戰國之六王

胥命而帝則帝矣

東西之兩帝

胥命于蒲而齊僖遂為東諸侯長序宋

公之上然則胥命之書特筆也

六月公會杞侯于郕○秋七月壬辰朔日有食之  
既

日有食之天變也食而既則變之尤者天事恒

象變不虛生人事感於下天變應於上春秋書

日食既者三

是年宣八年秋七月甲子不言事襄二十四年秋七月甲子

應而事應具存示有國者察於其故知天人相

與之際甚可畏也



公子翬如齊逆女

此內娶之始事逆女必卿公子之重視大夫翬

稱公子重逆事也

義詳閔二年公薨

九月齊侯送姜氏于讙公會齊侯于讙

我公親迎姜氏于讙也

夫人姜氏至自齊

不言翬以之至公親受之于齊侯也

冬齊侯使其弟年來聘

致夫人也公親迎于讙而曰會齊侯兼舉會禮也年致女于我而曰來聘兼修聘事也各于其



重者言之于逆致無譏焉自成婚以至致女凡  
六見王克掞云一以重其事一以深其文婚姻  
人道之大於始事備書之重其事也桓之薨變  
作于夫人于文姜詳書之深其文也

有年

志災也元年秋書大水必連歲無年至是而始  
有年故因無年而終言之於宣大有年亦然宣  
自六年以後書蝻三饑二大旱大水螽生雨不  
克葬各一十年之間災變疊見春秋兩書有年  
皆在桓宣之世其旨微矣



四年春正月公狩于郎

傳曰禮也田狩常禮不書此以首事書也禋之  
狩以與齊人書西狩以獲麟書焚咸丘非狩之  
常書之之義皆以譏變禮

夏天王使宰渠伯糾來聘

不書秋冬簡有脫也

五年春正月甲戌己丑陳侯鮑卒

甲戌己丑中間必有脫簡趙匡曰傳云公疾而  
難作此文亦據陳國史而記之驗此則經文甲  
戌下當記陳佗作亂之事全簡脫之耳



夏齊侯鄭伯如紀

外相如不書此以變事書也傳云欲以襲之紀人知之紀我姻故來告我書為後紀侯去國起文

天王使仍叔之子來聘

杜預曰仍叔天子之大夫稱仍叔之子本於父字幼弱之辭

葬陳桓公○城祝丘○秋蔡人衛人陳人從王伐

鄭

譏天王失政也天子討而不伐書伐鄭伐鄭不



服也伐鄭不服而後王命不行於天下春秋所以有作

大雩

大雩旱祭常禮何以書謹災變重典禮也雩而雨則書大雩以志禮雩而不雨則書不雨以志災

螽○冬州公如曹

州公周之三公書如曹以來我故來我必有事繼王伐鄭而州公來不言其事而其事可知矣時伯事未興王靈猶未盡泯州公如曹來魯蓋



合諸國以謀王室而卒無應者春秋書之傷周道益衰諸侯之無王也

六年春正月寔來

寔猶是也謂州公自曹來于是也記曰天子曰

非佗伯父寔來成二年傳王曰鞏伯寔來書來

不書事無事也

義見隱元年祭伯來

夏四月公會紀侯于郕

左傳紀來諮謀齊難也

秋八月壬午大閱

大閱簡車馬也國事莫大于戎祀故大閱大蒐



大雩大事于太廟史例以大書春秋於桓一書  
閱舉始事也昭定五書蒐明國事不出于公也  
於蒐閱無譏焉大事義見文二年

蔡人殺陳佗

按傳陳厲公蔡出也故蔡人殺佗而立之然則  
殺陳佗蔡人之私也而殺賊實天下之公佗弑  
君事不見經春秋文具而義見初不必盡備其  
事之本末矣凡弑君而見殺者十有二以討賊  
書者四人州吁無知討國賊法也陳佗夏徵舒  
討鄰賊法也



九月丁卯子同生

文姜生子也冢嫡始生國之大事故書魯十二公多出於媵妾同繫文姜所生又舉以太子之禮故得錄之

冬紀侯來朝

求請婚于王也書為後祭公逆王后起文

七年春二月己亥焚咸丘

火田也淫獵非禮於其甚者壹譏之義詳狩郎夏穀伯綏來朝鄧侯吾離來朝

兩書來朝同時二事也○春秋不生名諸侯亦



以別外大夫之書名者耳若夷屬之國邠黎來介葛盧

之類失國之君有書名者穀伯綏鄧侯史臣之職

主於紀名故名無不錄孔子修春秋則有名有

不名乃以省重複避淆混雖筆削所在未可概

執例以求

八年春正月己卯烝

烝嘗郊禘歲祀也書不勝書或以失禮一再烝或

以非時辛丑月郊或以災異御廩災乙亥嘗郊牛食角有事太廟仲遂卒之

類因變而書皆所以志典禮

天王使家父來聘○夏五月丁丑烝○秋伐邾



卷二  
譏伐邾也不書伐之者之人義繫於伐不繫乎人也

冬十月雨雪

建酉之月未霜而雪書異也春秋凡三書雨雪兩言大言大者以大為異此不言大者以失時為異

祭公來遂逆王后于紀

祭公因逆后過我故書來蓋祭公來命我主婚遂往逆后本以二事出故書遂以繼之

九年春紀季姜歸于京師

逆從王命稱王后歸從母家稱季姜魯為天子主嬀故逆與歸備書之

夏四月○秋七月○冬曹伯使其世子射姑來朝禮世子代父朝會位子男後曹魯屬國故使世子來朝射姑稱名比之于外大夫

十年春王正月

桓無王而元年二年十年十八年間書王者所謂書法也書王史例也不書王修春秋義例也有書以見其有不書故曰春秋之法以書不書見義



庚申曹伯終生卒

左傳射姑之朝也聞樂而歎魯人曰曹世子其有憂乎正月庚申曹伯終生卒距射姑來朝僅踰時月耳若是乎曹伯之使世子之來皆不無可譏矣春秋紀人事之變無所不有比觀之而莫不有其義故為人君父臣子者不可不知春秋也

夏五月葬曹桓公○秋公會衛侯于桃丘弗遇

公與衛侯約會在桃丘及往而彼弗與我遇改從齊鄭也弗遷辭史主紀內事故穀梁謂弗內

辭

冬十有二月丙午齊侯衛侯鄭伯來戰于郎

列序三國而首齊齊僖長諸侯也蓋衛鄭命之  
稱來戰伐不服而戰也書戰不書伐不以伐之  
義予三國魯桓弑君之賊義所當伐齊鄭乃首  
為會盟以定其位衛亦與約會而後負之春秋  
於桓世凡諸侯之加兵於我者皆書戰而不書  
伐此年來戰十三年及齊師戰不以伐之義予諸  
國也

十有一年春正月齊人衛人鄭人盟于惡曹



戰與我接故史詳其事而書爵盟非我與故史略其文而書人文有詳略而是非各以事見春秋不以名爵寓褒譏

夏五月癸未鄭伯寤生卒○秋七月葬鄭莊公○九月宋人執鄭祭仲突歸于鄭

書執仲于前而書突歸于後執仲所以歸突也罪宋人也亦即以罪仲也突不繫鄭蒙上鄭祭仲明執與歸是一事不言入乃仲逆之

鄭忽出奔衛

忽已立矣不書爵未成君也書名失國也於後

復歸書世子原其本稱以別於突也○春秋凡書奔皆罪也國君之奔始於鄭忽大夫之奔始於元咺其罪之輕重各於上下比事求之柔會宋公陳侯蔡糾盟于折

柔不氏而通名人以事錄重盟事也內大夫帥師自無駭始內大夫與諸侯盟自柔始

公會宋公于夫鍾○冬十有二月公會宋公于闕十有二年春正月

自隱二年至此無空書春王正月之文十二年春無事特書正月然亦不書王知非脫誤



夏六月壬寅公會杞侯莒子盟于曲池

平杞莒也

秋七月丁亥公會宋公燕人盟于穀丘○八月壬辰陳侯躍卒○公會宋公于虛○冬十有一月公會宋公于龜○丙戌公會鄭伯盟于武父

王迹既熄諸侯自擅無所稟命觀隱十年見兵革之亂也桓十一年十二年見盟會之亂也霸事興而諸侯有所統一無復此亂矣是以春秋不得已而與桓文

丙戌衛侯晉卒

日同而地異故兩書日即書者紀事之職追書者承赴之體重書丙戌史例爾存而弗削以為義不繫乎此也

十有二月及鄭師伐宋丁未戰于宋

先書公會鄭伯盟于武父次書及鄭師伐宋先書公伐齊納糾次書及齊師戰于乾時皆一役而再有事內戰不言敗言戰即敗矣此史文通

例

十有三年春二月公會紀侯鄭伯己巳及齊侯宋公衛侯燕人戰齊師宋師衛師燕師敗績



稱人稱師互舉之辭而義亦有偏重自戰者而言義責主帥故戰多稱人自敗者而言義責殘民故敗多稱師書戰不書地乃四國伐我而公援紀鄭與之戰戰于城下也○自是而後齊遂為東諸侯長序宋公上終春秋之世

三月葬衛宣公

凡諸侯在喪而有境外之事稱子禮也宣公未葬而戰稱衛侯從我史文非彼告文

夏大水○秋七月○冬十月

十有四年春正月公會鄭伯于曹○無冰○夏五

夏五文脫非闕也闕文本史法孔子修春秋每  
因之以取義公羊子云隱桓之世多闕文如隱  
不正始于隱闕其正桓不朝王于桓闕其王又  
如公薨不地不書葬凡此皆仍史文之本闕而  
闕法非自我而義有所昉至若天時不無錯漏  
兩年無秋冬人事不無舛迂紀子伯莒子盟于  
夏五無月字鮑剛簡編脫誤孔子第存而弗論所謂信以傳  
信疑以傳疑也

鄭伯使其弟語來盟

來盟前定也春秋主我使自外至故曰來稱其



弟明非大夫

秋八月壬申御廩災乙亥嘗

將嘗而御廩災嘗之變也春秋因災變錄典禮  
於嘗無譏焉壬申御廩災乙亥嘗志不害也

冬十有二月丁巳齊侯祿父卒○宋人以齊人蔡  
人衛人陳人伐鄭

凡師能左右之曰以以者不以者也謂本非所  
得制今得以之陳傅良曰東遷之後諸侯雖會  
伐非一國之志也非一國之志則會者序爵而  
已矣雖主兵也而小國序大國之上亦非一國

之志也以一國而用諸侯之師於是始

十有五年春二月天王使家父來求車

車服天子所以錫羣侯非職貢之常書求非所求也

三月乙未天王崩○夏四月己巳葬齊僖公○五月鄭伯突出奔蔡

人臣有罪去國例書奔以著其惡鄭伯君也見逐於其臣曷亦書奔曰國君為天子守土守而失焉其罪大矣聖人之教在乎端本清源故凡書諸侯之奔皆不書所逐之臣而以自奔為文



卷二  
所以警乎人君

鄭世子忽復歸于鄭

忽復歸書鄭世子突奔蔡入櫟皆書鄭伯自突  
入櫟以後忽之名不見於經而凡遇垂會鄆盟  
幽所謂鄭伯皆突矣名者所以紀實非褒貶之  
所存然則惡所取義乎曰書出書歸書入而兄  
弟爭國之罪著矣書鄭伯突書世子忽而庶孽  
奪嫡之罪亦著矣所謂直書其事而義自見者  
忽歸遇弑不書其為君也微矣文事不見於魯  
史春秋無得而書也

許叔入于許

因鄭亂而入國也史例凡入人之國曰入某自入其國曰入于某許糾入于許與自入其國者同文明許乃糾所固有也然因亂竊奪義之所不得春秋特書入等諸齊小白入于齊之例乃所以示譏

公會齊侯于艾○邾人牟人葛人來朝

三國之君也邾故為魯附庸今同牟葛諸君來朝庶方小侯爵不列于五等故稱人比之於外大夫三國同朝書法如滕薛來朝之例



秋九月鄭伯突入于櫟

譏爭國也其復歸于鄭不書

據衛侯衎復國非歸于衛書

所宜有無復道焉書入櫟而已矣

冬十有一月公會宋公衛侯陳侯于袤伐鄭

書會書伐既會而後伐也伐鄭謀納突也不書

納不疑于納也國非突所宜有本無納道兩書

伐而已矣

十有六年春正月公會宋公蔡侯衛侯于曹○夏

四月公會宋公衛侯陳侯蔡侯伐鄭

再書會伐著諸侯伐正輔不正之罪○會于曹

蔡先衛伐鄭衛先蔡時政出諸侯位次等儀視  
主者意向為升降滕薛侯爵而降稱子伯邾邾  
附庸而進列朝會春秋備志之

秋七月公至自伐鄭○冬城向

汪克寬曰凡書城未有繫月者蓋城築之事非  
可月成

十有一月衛侯朔出奔齊

記曰諸侯不生名至於失地則名之蓋國必有  
君一君出復一君立或內或外不名何以別之  
朔出奔書名內有君也



十有七年春正月丙辰公會齊侯紀侯盟于黃  
平齊紀且謀衛故也

二月丙午公會邾儀父盟于趯○夏五月丙午及  
齊師戰于奚

傳云疆事也特筆之志盟齊紀之好不終○前  
書會齊盟于黃後書及齊戰于奚前書會邾盟  
于趯後書及宋衛伐邾義皆以比而見

六月丁丑蔡侯封人卒○秋八月蔡季自陳歸于  
蔡

蔡季蔡侯之弟公子無去國之道特書歸以善

之不言其出何

黃書出奔比書出奔

出非有罪也出非有

罪而歸又合宜所以為善與季子來歸書法同

例

癸巳葬蔡桓侯

葬不稱公趙汭以為文誤

及宋人衛人伐邾○冬十月朔日有食之

十有八年春王正月

黃道周曰元年之書王謹始也十年之書王舉中也十八年之書王正終也

公會齊侯于濼公與夫人姜氏遂如齊



自會如齊也遂者繼事之辭特書公與夫人姜氏遂如齊禍發于夫人也○如齊文姜志也不書及而書與據僖十一年公及夫人會齊侯于陽穀見夫人專行桓公從之

夏四月丙子公薨于齊丁酉公之喪至自齊○秋七月○冬十有二月己丑葬我君桓公

春秋之法君弑賊未討不書葬此何以書葬以不討討之君子以桓之薨亦其自取焉耳于薨書地賊未討書葬聖人之情可見胡傳十八年書王而桓公書葬惟可與權者其知之矣

春秋取義測 卷之三

膠州法坤宏

莊公

元年春王正月

一時無事書首月三月有事矣仍書春王正月

者據定元年春不書正月正莊公之不即位也莊公之不

即位念母也念母非正也書正月不書即位所以正之也於隱之不即位亦然隱之不即位以讓桓也隱狗親愛亂序立之大常莊念母恩忌討賊之公義莊疑於無父隱疑於無君故春王



正月之書兩公同其文

三月夫人孫于齊

桓編無夫人姜氏至自齊之文此大書曰夫人孫于齊者不予其至也絕之也○公前與夫人偕出而不偕入則夫人猶在齊也莊於接練時錄母之變史臣稱情立文書曰三月夫人孫于齊等之書春王正月公在楚公在乾侯之例然不曰夫人在齊而曰夫人孫于齊此之謂史法聖人所以有取

夏單伯逆王姬

按傳單伯送王姬經書逆主我而言魯主王姬  
故單伯逆王姬于周而送之齊○單伯周臣也  
凡魯大臣之見於經者咸書其卒單伯前後凡  
數見而不書卒又與周召伯毛伯之稱略同知  
為周臣

秋築王姬之館于外

仇雠非所以接婚姻衰麻非所以接弁冕築館  
于外禮之變也

冬十月乙亥陳侯林卒○王使榮叔來錫桓公命  
追命也桓弑立不得錫命莊主王姬假王寵以



卷三  
請春秋特筆之以著天子之失政

王姬歸于齊

魯主王姬之嫁舊矣春秋獨於莊公詳書者以始事書實以變事書春秋之書外女未有詳於此者也書逆王姬書築王姬之館書歸于齊書卒以病莊公之親仇讎

齊師遷紀邢鄆郛

紀於魯為婚姻又主魯以圖存故紀事之本末錄於國史獨詳邢鄆郛紀邑也外遷邑不書特書之為下紀季以鄆入齊起文

二年春王二月葬陳莊公○夏公子慶父帥師伐於餘丘

於餘丘內邑也故書之如伐國之例或曰於發語辭如於越之於附夷國也

秋七月齊王姬卒

范甯曰主其嫁則有兄弟之恩死則服之故書卒

冬十有二月夫人姜氏會齊侯于禚

夫人之至不書書會齊侯于禚傳所謂志而晦也頻書姜氏會享如師如齊如莒譏婦人干預



外事莊國君不能防閑其母為世大誠

乙酉宋公馮卒

三年春王正月溺會齊師伐衛

納朔也言會伐不言帥師

言帥師

以會伐為義

蒙上夫人會齊侯知溺之會文姜為之

書為下齊人歸

衛俘起文

夏四月葬宋莊公○五月葬桓王

改葬也改葬非常也王志崩不志葬以天下而

葬一人有常禮有常時春秋之諸侯有不曾王

葬者矣

王葬孫得臣葬襄王葬

王有不以時葬者矣

以桓

七年匡以三月志其葬以見有不葬焉

秋紀季以鄆入于齊

亦齊遷之也鄆紀季食邑齊師遷紀邾鄆邵季不能守以鄆入于齊不言遷者史內詞明鄆猶為季有也特筆之為後紀邾姬歸于鄆起本

冬公次于滑

謀紀故也

四年春王二月夫人姜氏享齊侯于祝丘○三月

紀伯姬卒

入春秋首書紀履緌逆女迨紀之終事錄之特



詳於紀伯姬也則來逆書歸紀書姁姬歸書伯  
姬卒書齊侯葬伯姬書姁姬歸鄫書叔姬卒書  
葬叔姬書於紀也則齊鄭如紀書會鄆書盟黃  
書齊遷紀邑書次滑書紀季入齊書紀侯大去  
書凡以謹男女之始篤媯睦之誼重首事嚴典  
禮立教義也○范甯曰隱二年履緌所逆者禮  
諸侯絕旁期姑姊妹女子子嫁于國君者尊與  
己同則為之服大功九月變不服之例然則適  
大夫者不書卒

夏齊侯陳侯鄭伯遇于垂

鄭伯突也忽歸鄭稱世子突入櫟稱鄭伯故有以知鄭伯即突也

紀侯大去其國

書遷書入紀土地人民盡為齊有至是委宗廟社稷而去之故曰大去不言出奔者從史婉詞不以失國之惡累紀侯

六月乙丑齊侯葬紀伯姬

書齊侯葬紀伯姬紀滅矣不言齊滅紀亦史婉詞紀主我以圖存而卒為齊滅聖人備錄於經著齊人強暴弱小之無以自存也



秋七月○冬公及齊人狩于禚

公狩常禮不皆書禚夫人姜氏會齊侯地特書之譏莊公不能防閑其母且復遂焉

五年春王正月○夏夫人姜氏如齊師○秋郕黎來來朝○冬公會齊人宋人陳人蔡人伐衛

納朔也公會四國伐衛王人救衛朔入衛比事以觀諸侯之無王甚矣

六年春王正月王人子突救衛

下書朔入于衛未能救衛也特書王人子突救衛以變事書也王師大敗而後書伐救衛無功

而後書救皆以變事書也

夏六月衛侯朔入于衛

朔入衛不書復歸

據鄭世子忽書復歸

不予其歸也絕之

以王命○王親伐鄭而不能服王臣救衛而不能克無道極矣春秋能勿予伯乎

秋公至自伐衛○螟○冬齊人來歸衛俘

伐國不必皆歸俘書溺會齊師于前書齊歸衛俘于後知此歸特為溺會伐而來故傳云文姜請之

七年春夫人姜氏會齊侯于防○夏四月辛卯夜



恒星不見夜中星隕如雨

胡傳恒星列星也如雨言衆也人事感於下則天變動於上前此者五國連衡旅拒王命後此者桓文更伯政歸盟主而王室遂虛

秋大水無麥苗

書大水無麥苗以示憂民之教

冬夫人姜氏會齊侯于穀

八年春王正月師次于郎以俟陳人蔡人甲午治兵夏師及齊師圍郕郕降于齊師秋師還

不稱帥師之人以師為義也春師次郎夏師圍

邲秋師還輕用大衆厯三時無成功故詳書於冊稱師還者承始事而終言之以見其久

冬十有一月癸未齊無知弑其君諸兒

陳傅良曰弑君者連稱管至父則其專罪無知何君弑而無知受之則賊不在二子矣春秋誅利心是故連稱管至父實弑齊襄無知與聞故者也而無知受之則無知為逆首公子棄疾實弑楚靈比與聞故者也而比受之則比為逆首九年春齊人殺無知殺無知者雍廩而曰齊人討賊之辭也



公及齊大夫盟于莒

盟納子糾也糾齊之亡公子文姜主納之書公及齊大夫盟齊無君也無君而書公及以盟事為重也

夏公伐齊納糾齊小白入于齊

兄弟爭國也糾不繫國蒙上伐齊省文小白自他國入故繫之齊書納不宜納也書入不宜入也魯忘親而輔讎齊背盟以黨亂皆義之所不得

秋七月丁酉葬齊襄公

書葬明有君也小白先入而得立是為桓公  
八月庚申及齊師戰于乾時我師敗績

納糾不克而與之戰也及不書公不以公主此  
戰公伐齊為納糾也春秋之義大復讎齊我之  
仇讎能與讎戰雖敗亦榮故不以我師戰敗為  
諱而以伐齊納糾為譏公羊子以為復讎者在  
下合于春秋之旨

九月齊人取子糾殺之

特書納糾殺糾譏此舉之無名義

冬浚洙



十年春王正月公敗齊師于長勺

凡內勝曰敗某師

二月公侵宋○三月宋人遷宿

穀梁遷亡辭也其不地宿不復見也遷者猶未失其國家以往者也

夏六月齊師宋師次于郎

書次義繫於次也齊桓求諸侯而欲得魯魯未服次于郎以求成焉此為齊桓圖伯之始事

公敗宋師于垂丘○秋九月荊敗蔡師于莘以蔡侯獻舞歸

志楚禍之始也春秋之法內其國而外諸夏內中國而外四夷荆敗蔡師于莘以蔡侯獻舞歸中國之大變也特筆之

冬十月齊師滅譚譚子奔莒

志滅國之始也齊桓稱伯首滅天子之建國無王甚矣直書而罪自見

十有一年春王正月○夏五月戊寅公敗宋師于鄆○秋宋大水

凡外災弔則書比歲交兵怨不廢禮春秋錄之著邶鄰急病之義



冬王姬歸于齊

我為之主也不書逆與齊襄異者詳于始事其餘從略

十有二年春王三月紀叔姬歸于鄆

紀侯大去卒不書書叔姬歸婦人之義以歸夫家為正也鄆紀之分邑先君之廟在焉書歸于鄆予其歸也春秋錄內女紀伯姬以始事詳而紀叔姬宋伯姬又加詳焉蓋以其處變而能得禮特筆之以示教

夏四月○秋八月甲午宋萬弑其君捷及其大夫

仇牧○冬十月宋萬出奔陳

譏佚賊也書所奔之國則受之者之罪亦見不  
書宋人殺萬者義在責宋萬之奔

十有三年春齊侯宋人陳人蔡人邾人會于北杏  
志桓圖伯也齊桓首會諸侯各使大夫聽命弗  
親往

夏六月齊人滅遂

齊桓會諸侯于北杏魯不至故滅遂以脅我遂  
我屬邑邑而言滅書法如晉滅下陽之例

秋七月○冬公會齊侯盟于柯



桓滅遂以脅我故為此會

十有四年春齊人陳人曹人伐宋

宋人背北杏之會故伐宋三國稱人大夫會伐也五伯摟諸侯以伐諸侯此其始事直書而罪自見

夏單伯會伐宋

單伯何以不稱帥師

據翬稱帥師

王官也啣命以總

羣侯王師不出也會伐何以不言三國

據翬言會宋陳

蔡衛伐鄭以會伐為辭不以會諸侯為辭也重伐事

也

秋七月荆入蔡

志楚禍也敗其師執其君復入其國焉

冬單伯會齊侯宋公衛侯鄭伯于鄆

會于鄆宋服也齊桓假王命伐宋單伯臨焉故  
主為此會其曰單伯會齊侯宋公衛侯云云者  
史臣尊內同王臣於內君書法如公會諸侯之  
例○伯事未興以前周之典禮猶未盡廢王事  
之見於春秋者王伐有書王救有書茲單伯之  
會伐會鄆伯主請於王以合諸侯魯史所承猶  
王朝之文告也盟幽而後王終伯始會盟征伐



卷三  
之權盡歸外藩于洮于翟之盟葵丘之會尹單  
之伐鄭劉文之侵楚王官與列侯同序王朝文  
告不復行于天下

十有五年春齊侯宋公陳侯衛侯鄭伯會于鄆

齊桓主會也列序諸侯而首齊志始伯也

夏夫人姜氏如齊

兩鄆之會魯不至齊桓欲成伯而亟親魯故夫  
人姜氏如齊棄夙怨繼新好春秋筆之為下盟

幽起文

秋宋人齊人邾人伐鄆

諸侯為宋伐邾也宋主伐事故先宋邾宋之附庸是後與伯會進為小邾子

鄭人侵宋

鄭人聞之而侵宋書于經者志諸侯兵爭之禍予伯非聖人之得已

冬十月

十有六年春王正月○夏宋人齊人衛人伐鄭○秋荆伐鄭

楚禍及于鄭也鄭諸夏要領南北樞紐終春秋之世為伯主輕重焉



冬十有二月會齊侯宋公陳侯衛侯鄭伯許男滑伯滕子同盟于幽

志桓伯也同盟同推桓主是盟也會不書公為內諱也桓非受命之伯諸侯同心私相推戴故以為大惡而諱之自同盟于幽中國諸侯無敢自為盟會者禮樂征伐之權專歸外藩王事于此而終伯事于此而始春秋一大變局也滑滕伯子序許男下爵次不以周班政自諸侯出也

○書同盟始此

邾子克卒

北杏之後邾人與伯會列于諸侯故稱子赴于

同盟故卒書名

例詳隱八年宿男卒

十有七年春齊人執鄭詹

鄭不服也比書齊人執鄭詹齊人執陳轅濤塗見伯者以力服人之效

夏齊人殲于遂

齊之戌者也遂我屬齊滅而戌之故齊人之殲見于魯史孔子特筆之以為強不義之大戒

秋鄭詹自齊逃來

書逃來為下齊人伐我西鄙張本



冬多麋

麋常有物多則為異多麋有盛齊大災春秋于  
莊編備書之其文姜之祥乎

十有八年春王二月日有食之

穀梁夜食之說李光地非之張瑗三傳折諸謂  
春秋日食三十六有甲乙者三十四歷家推驗  
精者不過得二十六唐一行得二十七周王朴  
得二十五莊十八年二月日食古今算不立法  
有淮南衛朴者精歷術春秋日食獨得三十五  
惟此算不入與諸家同愚謂天道遠矣神而莫

測聖王克謹天戒不以術數矜也

夏公追戎于濟西

譏追戎也易曰重門擊柝以待暴客戎去而後  
追之知疆場之無備

秋有蜚○冬十月

十有九年春王正月○夏四月○秋公子結媵陳  
人之婦于鄆遂及齊侯宋公盟

媵微事媵陳人之婦又微乎微者此以遂事書  
爾公之事齊也後既又受鄭詹齊宋陳謀伐魯  
公子結以媵事至陳訶知之假公命以與齊宋



盟魯史書於冊而聖人取之明人臣出境有遂  
事之義○內臣通名于經者以貴以氏公子益  
師臧孫辰諸人是也以賢公弟叔肸是也以事  
無駭翬柔溺書無駭以帥師書翬柔以會伐會盟書溺以會齊師公子結  
之類是也結奉使有職非君命輒盟公侯特筆  
之志禮之變

夫人姜氏如莒

春秋于夫人之孫不書其至而書會書如不復  
為隱者傳所謂絕不為親禮也以禮絕之也文  
姜多行無禮備書于冊至再如莒甚矣

冬齊人宋人陳人伐我西鄙

因鄆盟而取成焉書伐我西鄙不以難邇我國  
從史婉詞

二十年春王二月夫人姜氏如莒○夏齊大災  
外災不書公羊子以為痢也其書及我也齊與  
我比鄰災以大告特志之

秋七月○冬齊人伐我

伯事也我病中國桓志欲南征乃先北伐所謂  
不務德而勤遠略

二十有一年春王正月○夏五月辛酉鄭伯突卒



忽未成君而出奔復歸于鄭稱世子後不復見而突自入櫟以來會盟侵伐以及卒葬不絕書于冊忽正而不克自立突不正而能君列于諸侯據事直書是非自見法戒自昭聖人何容心焉

秋七月戊戌夫人姜氏薨

范甯曰婦人無外事居有常所故薨不言地

冬十有二月葬鄭厲公

二十有二年春王正月肆大青

青罪也大青皆肆小人之偉免者多矣莊以母

喪推恩春秋特志之

癸丑葬我小君文姜

桓公之薨姜氏與聞乎故莊以子不可絕母薨之葬之春秋詳錄史文豈予之也王克掞云子無絕母不概弑逆大故文姜與弑絕之于宗廟也春秋書薨葬正以譏非禮非取無絕母之義陳人殺其公子御寇

殺書公子義繫乎殺公子也人衆詞見國亂無政衆擅殺而不出於君也

夏五月



書夏五月而不繫以事史有脫誤

秋七月丙申及齊高傒盟于防

謀婚于齊也大夫書名高傒伉也及不書公抑其伉也春秋之義為尊者諱

冬公如齊納幣

內適外曰如乃朝聘通稱未有書其事者書事非事也三書納幣觀社逆女皆所以示譏

二十有三年春公至自齊○祭叔來聘

祭叔祭公之弟子弟隸其父兄出供國事非禮意所惡聘不稱王使非王使也譏私聘也

夏公如齊觀社

非禮也曹劌諫曰不可夫禮所以整民也故會  
以訓上下之則制財用之節朝以正班爵之義  
帥長幼之序征伐以討其不然諸侯有王王有  
巡狩以大習之非是君不舉矣君舉必書書而  
不法後嗣何觀按傳所謂法即禮也春秋之義  
朝聘會盟備書于冊所以明法也內君臣書如  
君自行則朝也如齊如晉之類使臣則聘也如陳如魯之類而  
皆不言其事乃若非朝非聘則各以其事書之  
遂與夫人姜氏如齊納幣觀社葬原仲之類所以明戒也曰春秋諸



侯大夫之朝聘會盟之法乎曰此亦言文武之法爾若列侯無王而自相朝聘大夫無君而擅相會盟又所謂據事直書而義各自見者

公至自齊○荆人來聘

荆敗蔡伐鄭洊陵上國其聘我也非能慕義而來亦播其威德以示武於諸侯聖人以其事同猾夏特筆之稱人不稱使君臣同辭史臣略外文例

公及齊侯遇于穀蕭叔朝公

蕭叔朝齊侯于穀因而朝我不言來于外也朝

禮受之于廟于外非禮也

秋丹桓宮楹

四廟迭毀無主名宮者據後桓宮僖宮災

哀三年

則桓僖固有別宮矣蓋桓以弟繼兄不祧隱故別立桓宮以次隱僖以兄繼弟不祧閔故別立僖宮以次閔春秋于諸宮丹刻不書而書桓于羣公作主不書而書僖因變事正典禮著廟制也

冬十有一月曹伯射姑卒○十有二月甲寅公會齊侯盟于扈



謀逆姜氏也

二十有四年春王三月刻桓宮桷○葬曹莊公○  
夏公如齊逆女

親迎常事不書莊即位二十四年至是始逆女  
蓋制於母姜必欲娶其黨卒以齊女淫亂篡弑  
相仍春秋以為變事特筆之

秋公至自齊○八月丁丑夫人姜氏入

入于國也書入不書至公先至闕夫人告至  
之禮故史無其文春秋因之以志變

戊寅大夫宗婦覲用幣

非禮也御孫曰男贄大者玉帛小者禽鳥以章物也女贄不過榛栗棗脩以告虔也今男女同贄是無別也男女之別國之大節也而由夫人亂之無乃不可乎

大水○冬我侵曹

責伯也戎侵曹狄伐邢入衛天下之大故也伯事興而列國有文告故魯史得備書春秋特筆之

按傳隱九年北戎伐鄭不書桓六年北戎伐齊不書至是始書

曹羈出奔陳赤歸于曹

羈曹世子名不稱爵未踰年之君也赤曹之庶



葉羈奔而赤歸為戎所納也不繫曹蒙上省文  
此與鄭忽突爭國同譏劉敞曰春秋治治而不  
治亂使鄭忽曹羈事親而孝為上而禮在喪而  
哀臨事而恭大夫順之國人信之雖有宋戎之  
衆突赤之孽何緣而起然而君臣交爭兄弟為  
讐者上有失故下得也

郭公

公疑作亡書法如梁亡之例

二十有五年春陳侯使女叔來聘

聘使大夫常禮爾何以書志内外大夫之私交

政也凡聘使來無不以名通者

齊國歸父衛女甯俞之類

叔以字通季友之私也故書如原仲之例

夏五月癸丑衛侯朔卒○六月辛未朔日有食之鼓用牲于社

吳澂曰社者祭地示也其祭有常禮不書經所書社凡四非為社書也

伯姬歸于杞

內女之歸不皆書杞伯姬之事屢見于經為詳錄其始末比以見義

秋大水鼓用牲于社于門



左傳凡天災有幣無牲非日月之眚不鼓

冬公子友如陳

繼聘使之來而有此如報女射也比觀後如陳  
葬原仲知聘使之交出於季友女射之私特筆  
之

二十有六年春公伐戎夏公至自伐戎○曹殺其  
大夫

義繫於殺大夫故特書其官而其人之名氏有  
不足書者矣胡傳春秋於諸侯之大夫會盟征  
伐雖齊晉上卿必錄其名氏至於見殺雖曹莒

小國亦書其官愚謂孔子筆削義例於此可參其凡

秋公會宋人齊人伐徐

我主兵也戎徐舊為魯患伯禽嘗征之隱桓世有戎盟莊有濟西之役春伐戎秋伐徐伐徐亦治戎也齊桓圖伯首勤宋魯故鄭侵宋齊助宋以伐鄭戎徐病魯齊宋復助我以伐徐宋魯既服東國諸侯無敢不服者矣明年同盟于幽遂伯天下

冬十有二月癸亥朔日有食之



二十有七年春公會杞伯姬于洮

左傳非事也天子非展義不巡狩諸侯非民事不舉卿非君命不越境陳傅良曰內女為夫人七見于經未有書公會者而會自伯姬始由是來朝其子由是來求婦伯姬之為皆未之前聞也

夏六月公會齊侯宋公陳侯鄭伯同盟于幽

同有同也同尊周也再書同盟諸侯同志而盟翌戴天子大書公會齊侯云云穀梁子謂於是而後授之諸侯予其伯也

秋公子友如陳葬原仲

如陳公事也葬原仲私行也原仲稱字季友之私也內臣無會葬外大夫之禮特書如陳葬原仲明友假公事以行其私○自後大夫為政以私出外交者多矣書不勝書此壹譏以見義

冬杞伯姬來

書來不當來也春會于洮冬杞伯姬來比事觀之而義自見

莒慶來逆糾姬

莒慶通名與我接也我叔姬歸之不書歸不書



女別於為君夫人者

杞伯來朝○公會齊侯于城濮

王使召伯廖賜齊命且請伐衛公會齊侯于城濮謀伐衛也

二十有八年春王三月甲寅齊人伐衛衛人及齊人戰衛人敗績

齊桓奉王命以伐衛故二十八年書王書月書日以大其事王者之師有征無戰書齊伐衛書衛及齊戰齊不度德衛不量力皆罪也春秋並著之以明伯事之效

夏四月丁未邾子貜卒○秋荆伐鄭公會齊人宋人救鄭

伯事也特書之齊桓圖伯首親宋魯次勤鄭三國服而諸侯畢服矣然後封衛城邢南伐荆楚翼戴王室功莫高焉故曰五伯桓公為盛

冬築郿○大無麥禾臧孫辰告糴于齊

國有饑饉卿出告糴禮也春秋因災變著典禮特筆之

二十有九年春新延廐

穀梁子曰古之君人者必時視民之所勤民勤



于力則功築罕民勤于財則貢賦少民勤于食則百事廢矣大無麥禾告糴于齊冬築郿春新延廐以其用民力為已悉矣

夏鄭人侵許

齊命也自後許從中國

秋有蜚○冬十有二月紀叔姬卒

錄紀侯去國而不錄其卒紀亡矣特書紀叔姬卒存紀也綜上紀叔姬歸鄆而終其事

城諸及防

三十年春王正月○夏師次于成○秋齊人降鄆

上書師次于成下書齊人降鄆則次成之師為  
鄆故也鄆紀邑亡國遺俘以無救而敗齊人逞  
強公之不勇于義皆見矣

八月癸亥葬紀叔姬

因魯人往葬而特書之錄叔姬也

九月庚午朔日有食之鼓用牲于社○冬公及齊  
侯遇于魯濟

謀山戎也以其病燕故

齊人伐山戎

三十有一年春築臺于郎



譏遠也諸侯之觀不過郊

夏四月薛伯卒○築臺于薛○六月齊侯來獻戎捷

桓以旗獲過我史故以事書來獻戎捷史詞也敵愾獻功諸侯所以事天子諸侯不相遺俘春秋因事變正典禮特筆之

秋築臺于秦○冬不雨

書不雨災也禮莫重於敬天災人君視朔必告廟史臣紀事必登策春秋筆削史文示憂民之教有以時書者此年有以月書者僖二年十月三年正月四

月有歷時一書者

文二年自十二月至秋七月

莊編比書纂

郿大無麥禾告糴新延廐城諸及防有蜚三築  
臺冬不雨春城小穀取義微旨具見

三十有二年春城小穀○夏宋公齊侯遇于梁丘

○秋七月癸巳公子牙卒

牙有無君之心季子先事誅之不成其惡喪以  
大夫之禮故史志其卒聖人以季子恩義俱立  
變而得中特錄之以示教

八月癸亥公薨于路寢

范甯曰公薨皆書其所謹凶變



冬十月己未子般卒

子般莊嫡嗣卒不稱薨未成君也春秋之法君存稱世子君薨稱子某既葬稱子踰年稱公有子則廟廟書葬無子不廟不廟不書葬

公子慶父如齊

告立新君也

狄伐邢













